

## MEKA

### مكة المكرمة

Allah, dž.š., naredio je Ibrahimu, s.a.v.s, da uzme svoju ženu Hadžeru i sinalsmaila i povede ih sa sobom u područje Hidžaza, na Arabijskom poluotoku.

Pošto su stigli u jednu od pustih dolina bez vode, biljki i životinja, naredio je svojoj ženi da ostane na tom mjestu, zajedno sa svojim sinom Ismailom.

Nakon što je Ibrahim, s.a.v.s., krenuo od njih, njegova žena ga upita:

“Je li ti Allah naredio da nas ostaviš u ovoj divljini?”, na što je Ibrahim Halilullah (Allahov prijatelj) odgovorio: “Da!” Na to je Hadžera rekla: “Onda nas neće ostaviti na cjedilu!”

Kad se Ibrahim udaljio od njih, molio je svoga Gospodara:

“Gospodaru naš, ja sam neke svoje potomke naselio u kotlini u kojoj se ništa ne sije, kod Tvoga časnog hrama, da bi, Gospodaru naš, molitvu obavljali; zato učini da srca ljudi čeznu za njima i opskrbi ih raznim plodovima, da bi zahvalni bili.” (Ibrahim, 37)

Hadžera je ostala sa svojim dojenčetom Ismailom u toj divljoj dolini, sve dok joj nije nestalo što je imala sa sobom od hrane i vode. Ožednjela je, a ožednio je bio i Ismail, pa se uputila ka dolini, tražeći vodu. Popela se na obližnji brežuljak Safu i nije ništa vidjela; zatim se spstila s nje i požurila ka Mervi, pa ni s nje nije ništa vidjela, sve dok to nije učinila sedam puta, trčeći lagahno između Safe i Merve. Na koncu se umorila. Vratila se svome sinu Ismailu i primjetila da voda izvire ispod njegovih stopala. Odmah se tome obradovala i zahvalila Allahu dok joj je voda prolazila kroz ruke miješajući se s prašinom i gubeći se u njoj. Ona je povikala: “Zem!... Zem! (“Stani!” “Stani!”), te je stoga taj izvor i nazvan Zemzem.

Nakon što je izbila voda ispod Ismailovim stopala, došle su ptice u dolinu koja se ispunila životom.

Ubrzo je tuda naišao karavan iz Jemena. Znajući da je to pusto mjesto, bez vode, nisu imali namjeru svraćati, ali pošto su vidjeli ptice na nebu, iznenadili su se i krenuli da pretraže dolinu. Vidjeli su izvor Zemzema i pored njega Hadžeru i njenog sina Ismaila. Jedno pleme se nastani u toj dolini, a Ismail, kad poraste, oženi se od njih. Kasnije su mu se umnožila djeca, a mjesto je postalo poznato po imenu Ummul-Kura ili Meka. Od sinova Ismailovih, s.a.v.s., nastala su arapska plemena. Tako je Allah, dž.š., uslišio Ibrahimovu, s.a.v.s., dovu.